

四庫全書

集部

欽定四庫全書

見素集卷十三

明 林俊 撰

墓誌銘

封工科給事中林公墓誌銘

莆龍坡有修潔之士曰林朴叟美鬚豐頰狀貌如神人
倣儻不屑為生計居僅蔽風雨而庭庀之間名花怪石
豆列棊置至紛不可行每旦日未出輒汲水灌花或翦

結出奇態以自娛悅客至看花輒命酒共酌有達官過輒以疾辭叟嘗有官封束帶纓冠如受縶然平居惟野服藜杖步屨閭里間人問之遊則遊邀之飲則赴干以事則謝曰吾不能效流俗屏息厚顏取錙銖以自溉叟雖晦于時然自力為義叟季弟無後死命仲氏子嗣之又死則公其田共家祭已不牟為利歲大旱渠竭叟姻家恃豪右絕陂上流下田將稿死叟諭之不從白之官決之田得有秋皆曰公仁人公活我也紀之于石不忍

忘林邵州刺史蘊之後十二世曰昭度以計偕不祿配
翁氏以孝義聞二子嗣先嗣宗以進士顯八傳而至叅
軍用和生原真原真生宏泰宏泰三子叟其長也諱夢
字良弼封徵仕郎工科給事中娶黃氏封孺人先卒子
二元甫進士出身工科給事中改南京禮科給事中哲
甫鄉貢進士女三適義官方瑛義勇前衛經歷王以節
士人郭遠孫男五有恒有祿有章有教有孚叟晚得疾
疾竟以是卒於成化丁未八月六日享年七十有五明

年月日葬瀨溪紫帽峰之原與孺人同兆次俊蚤友給
事兄弟間以姻婭辱叟愛厚前年歸得拜叟床下敘言
猶在耳也叟今不復見矣嗚呼其何忍言耶其何忍言
耶給事既得葬卜以按察僉事林長深之狀授俊請銘
序而銘之銘曰子姓胙氏少師孺始九刺陵遷不絕又
綿曰昭度甫邵州之裔孝義內聞不顯亦繼於穆予蒸
朴叟是承蘭芷繼佩有鬱斯馨叟之所好孰跂而窺衆
所競趨叟謝不為猗二良嗣世濟其美執競遲遲休聲

載起維蓄弗施維畱弗章有鴻厥慶先考用光紫帽嶷
嶷其下玄宅我銘貞石以詔無極

故湖廣按察僉事王公墓誌銘

弘治乙卯王公一齋以疾疏于朝乞致仕去未下而卒
七月五日也俊既治其後事其子璵奉柩歸葬某鄉之
原以副使周君南狀丐銘諸石嗚呼公不可復見矣公
諱純字弘文先趙姓宋宗室魏王廷美之後世家河南
王八世孫沅夫為江陰錄事叅軍娶知滁州陳光女光

仙居人無子知錄從以居子時稟鹽官主簿主簿子若
愚所友王庚甫無子求季子醫學訓科嗣宗為嗣遂襲
王姓訓科生古鐸古鐸生懷廣用公貴贈南京都察院
經歷母某贈孺人公年十四游郡庠六就浙試弗利入
胄監成化丁酉領應天鄉薦後三年登進士觀工部政
承檄董三大臣墓事費省功集還授工部主事三原王
公恕言事忤旨落太子少保守南京兵部尚書致仕公
言恕社稷大臣朝著無與比列不可使去疏聞下公獄

左官貴州思南推官平氣恤人聲聞夷獍戊申今上即位薦者章十二上凡系公名遂擢南京都察院經歷壬子陞湖廣按察司僉事奉勅提督學政崇正學抑澆風衝冒寒暑晝夜兼數程旁州僻邑馬跡俱遍足寒濕殆不勝舉武猶力疾視學出按襄陽晨發均州界山道中中風不語七日始蘇舟還語人曰曷亟死亟死見素善禮殯我無憂無苦我為醫且差忽加翻胃竟死生宣德甲寅七月二十七日享年六十有二配某邑大姓某之

女封孺人子男恢琰璵某出焮炤側室某出女一適吳
洪岳孫男九應龍應選應祥應瑞應陞應奎應辰應愚
應台公踔厲任真無少鈎距不當其意輒見色詞剛氣
勁節凜凜為士夫倡性至孝父母忌辰素食腆祀色戚
若初喪內行淳備閨門修整尤樂為義事嫁故人廖璿
孤女舉門生張璞父喪皆可紀以傳也銘曰道紛以歧
虬結嶮巖笑語嚅唼城府底窺物竟鈍完亦以芒缺受
直視傭迺秦迺越爰有碩人翠壁丹厓惠方孔直外朗

中開警嬉石良載植載耨勤艱憊疲宿痾斯邁河汾蘇
湖槩穫成風式時令譽運委道崇鬱紆仙原維是窀穸
峻節開先有昭潛石

故陳母林孺人墓誌銘

弘治丙辰鳳山陳母林孺人卒又明年子高請銘墓隧
之石孺人年二十歸舜謀君九年而寡質甚都德憲甚
完故所裝送資賄甚盛利若有者撼四至孺人覲閔湛
默中矢靡它日顙顙絕脂粉著短布裳為陳氏撫遺孤

寸蓄銖累增市利田宅久之孺人女適林時傑踰年亦孀孀時年十九孤未晬孺人謂曰吾母子之命則懸于天天若祚林舉若子以承前祀繼來世如吾陳死日且瞑守志事易義婦無二天若善為之女竟撫有孤以節發聞甚偉君子頌其烈而能教服益深諱靖字淑清孝子攢之後按察使坦之女戶部照磨師蒼之婦陳故相家閨範斬斬孺人閑教德門富無驕習奉姑鄭能易嚴為慈執務先已不辭劇易妯娌姻隣德所惠頗至性

簡言心所可否無爽毫分以義自割剛男子時弗及晚
年高求上貞節辭曰事須賂成毋令貧吾家婦人有善
莫名生無愧迺已九月九日以疾竟卒生已酉六月四
日享年六十有八子即高娶柳廷植女女即適時傑者
戶部員外郎瑋之子次適方思魯通判熙之孫孫男嘉
賓嘉言嘉音嘉禾女適郡學生林嘉懋其二尚幼墓在
胡公里金櫃山之原從夫兆也葬月日九月 日銘曰林
陳世繼忠孝耀聞後千百年以蔚以芬爰及家人卓有

貞女夙違所天莫我有處繫生弗淑造物胡尤人只弗
諒耿耿隱憂維陳有孤維林有祀啓節垂貞維母有煒
壺峰孔嵬金櫃同穴昭我謚辭區明風烈

翰林檢討林思軒先生墓誌銘

思軒林先生疾革語其子戶部主事夔曰吾志素厚汝
勿處於薄業素貧汝勿處於富我死以狀累茂烈而見
素丐銘遂逝弘治丁巳五月念日也明年葬先生主事
以陳君之狀請銘嗚呼鄉國名賢典刑斯在其最純以

烈則彭惠安陳康懿先生意其儔歟或曰是其地特異
其植立又難又曰先生奚下胡安定孫明復俊未敢僭
論要之決非今之人能然也先生秩故卑每聞善朝政
喜津津現容色善人亦如之有拂意眉結首疾口咄嗟
急義若嗜欲然朱學正譴死為具棺歛鞠其孤諸生病
具藥死具殯貧無為歸具葬嘗所與遊與鄉之士夫則
又如是焉襁貲至竭簪珥以故親之喪葬至粥田自給
官一生所餘俸金無三十兩宿負間存者噫亦難甚矣

諱大猷字子道高祖善同泉山山長曾祖仕敏大理少
卿郎中知府終教諭祖勤教諭父信贈翰林檢討妣蔡
贈孺人配周用夔封安人先生薦己卯魁亞為新建教
諭舉山東廣東考試官選國子學錄轉監丞再轉為翰
林檢討階徵仕郎監丞如故瞻博善考禮儀梨宿嚴而
能以冲晦懇欵相結納澆漓風沮士竟無怨言在國子
執經恒五六百輩嘗偕王勅上四川提學僉事上用勅
又薦江西先生以親未沾命辭內行純謹官所必迎養

族里必和孝子墓陟剝先生樹仆碑封故窀復田以充
歲謁五世祖墓失先生訪之勤夜夢臥一麓果得識焉
所修有族譜族儀四世文集所著有思軒藁世史正綱
大學衍義補先生皆嘗是正生宣德乙卯十一月十四
日子即主事次郡庠生晉皆才士天其於是厚償乎墓
在龍橋檢討兆之東五十步許先生葬左安人壽藏虛
右焉銘曰錫類啓祉式官式貧蜚英騰茂碩實公身弗
庇弗濡施則多有經德憲輿克禪克守王靈昭命六詔

皇皇臣越非分慶行有芳解渤澌瀾伊涓伊滴曾是報
只乾坤之德臣耄謏庸維腑及肝永矢弗渝息喘誠殫
龍岡鬱蟠金石在礪維樹維封公以世世

文林郎監察御史林西園公墓誌銘

西園公貌古沖晦不肆為時俗銜耀人鮮克知者一日
會黃司副汝亨所公獨端坐無言既去予曰是無類有
道者黃曰然是故為進士督墳巡撫上其事為令者為
行人使諸藩給邊餼絕饋遺者既為監察御史言慎名

器厚國本七事名斥主柄匪材又按傳太監假子出巡
雲南言孟密不當立安撫階亂事出萬學士乖違程尚
書依附馬序班受賕又言鎮守故遺玩具淫巧過制宜
鎔毀母以上供疏入太學士南陽劉公驚曰林得御史
體未可以貌取人鎮守所漁利十汰八九狐鼠薰灌殆
盡代者心不樂然敬憚之曰吾閱御史多矣無如林者
黔國沐公廉重寬博祿史張聰盜柄都司屈膝不為禮
邊務多紛更受賕事敗沐欲徐去以他藩司為達予曰

是有撫巡既而都憲王公怒見詞色公獨唯唯人曰怒難救也予曰無亦唯唯者耳既之王頗解而公執如故聰竟成廣西故事鎮守邀飲御史坐右公始坐左幕下治文書頗弄舞方執酌跪公曰善事主者毋襲故常其人骨竦膝觸地有聲二府官屬盡歛弗肆叅將縱麾下私干崖奪印殺人公覈實論死數人降調數官叅將坐落職閑住都司有粗悍者公陰折之時弗自勝然語人必曰林道學林道學有安乃者土官子土官坐事死獄

中通把利其田言乃謀叛普顯者土官弟嫂氏虞爭官
誣以通黑脚夷三千入寇皆繫獄十餘年被累死者百
計土人懼其出則飛語謹叟無敢白者公駁曰乃叛從
者何人寇何鄉黑脚夷至三千時當有飛報征調事宜
得自默遂不能難乃顯得安置四川自餘平反益衆蓋
公智而守以愚動而行以靜正而居以和繁而示以簡
無喜色無怒容故法克施人無怨若議者在滇幾三年
代者以憂中止繼者當復來公方別僚屬出界上以俟

繼者病告報至三司欲觀舉止除遣俟別方言公揖入
敘坐如常不復問故神采無動者人服有養以學行選
督南畿學政黜浮華重廉退士風就醇聲實益副銓曹
上為太僕少卿未命方復有所須則公以省墓北上告
終浦城弘治丙辰十月初七日也生丙寅十一月十八
日諱瑋字廷玉候官雲程人曾祖陽祖信任考秀用公
兄雲南按察副使公玘初官贈承德郎南京刑部主事
妣周贈安人配鄭封孺人子男文鑑娶某文綱娶某女

適王主事子至陳審理子沂孫男諧公孝友仁信學求
心身不專為進取嘗十年不赴會試所歷迪功修職承
事文林四郎所著西園藻宗法存古錄墓在何家坑之
原六窰公葬左之左又左則鄭壽藏中左若右則公之
兄瑄瑋嫂詹黃空焉銘曰羽以翠剝介以神枯晦晦西
園葆有於無服美含奇式酣式飫巽時懦夫亦粵處女
鉤鉤競事我職其愚膨脞潰溢我守其虛乃櫛其鬢乃
剗其垢乃沃其焦乃澄其濁風稜言言以翕以張作有

多士譽眩道章梗梓巨施瑜瑾殊價起起維辰方中斯
夜薈蔚何坑相是佳城垂鴻考禎德輝式銘

中議大夫贊治尹興化府知府王公墓誌銘

公諱弼字存敬號南郭王之先錢塘人五季亂始祖棄
鄉之黃巖寧州家焉南門自鉉徙鉉生全祿全祿生阜
阜生柎是為公父鄭重宣朗為和州判官有名以求養
親致其仕以公恩封刑部主事母劉妻丁封安人公第
謝遷榜進士知溧水溧巨滑席勢武于鄉無誰何問公

募獲論死溧人稱萬口為快有湖可田公督民隄果田
中貴人視馬有歲賂公言非公弗與循以至今三年入
為刑部主事轉員外郎差讞山東大獄還拜興化府知
府或為公難則曰第視之既至則曰是故秉禮之鄉視
溧易與則盡出古意為之律身必端布令必信制度必
節祀典必嚴科貢必厚郡孝節必舉以旌或扁其門曰
三節曰雙貞曰一鄉善士或臨視其家或設賓榻如陳
蕃孺子然飲射一宗儀禮登降拜跪盡日無惰容俗婚

喪過侈佚子事賭博家為落公設牌正副定中式書勸
戒文使時開喻弗變伺舉以懲五伯攝人狼假為虐公
立三限批明書期日授訟者自付被論執就理後期有
笞民得無擾賦稅更徭吏胥多舞智公身自處分使受
成案無所與事苞苴杜絕俗喜吏賁緣勢家否則主自
諧價公必俟藩司具名牒下方與覆實頽風大沮狡僮
盜墓松山伐遂赭豪右私牙僧通海舟販糴穀價遂翔
貴公皆禁治之守臣更驛法非人情公譬止不可疏復

其舊溫文進鈔漳州守者白遣民兵自益公曰莆瀕海
宜以自防遂勿遣養濟居河上游水汙大風家闔城病
之先是欲遷輒格不行公擇厲壇之右立屋園井廁視
舊特軒敞以餌其便則立與移出悉故屋焚之平其地
立射圃端午競舟長訟耗費禁者乏要領迄未能息公
使自實盡市以修橋梁私匿逮及社人無縱弊源頓塞
前政多因循學校壇宇公解木蘭陂陽城斗門堤壩路
道多圯則為之蔡忠惠祠岳蒙泉祠李守衣冠藏彭惠

安陳大常卿賜葬則又為之漏澤院隘則別增之它若牌坊亭碣不可勝載費盡出積餘民無所與為知公牘叢委笑語指揮每旦日視事日中則庭無留人坐公堂閱古書宿弊清汰而利所宜興無復後遺獄訟衰止盜賊屏息治理書天下最莆百餘年之守宜未有先者故公安于莆而莆若不可一日無公德者感罪者愧無怨去而思來而喜病而禱而卜沒而祠而碑請衣冠而葬風謠盈耳哭者聲必哀盡焉實弘治戊午十月二十四

日也公形短無中人而神觀英爽明炳幾先孤脫凡累
隱然古君子自期天下視為國器仕餘能自力為詩清
硬崛竒巋然山谷老氣在刑部稱小翰林嗚呼海內如
公厥亦指無多屈矣公之神必祀鄉賢蹟必傳循吏詩
必傳於今與後無疑蓋棺事定俊得銘所以死者生已
已八月十有一日子培增坊墀壘垆臺增坊為邑庠生
墓在方山之原致封君之命歸喪且速銘者公兄烜也
銘曰於以彭於亦以殤脩短乃常於以顏於亦以蹠萬

物迺郭維霸相維瑄師維終乃疵天恠靈奇完乃破高
乃寡和維立艱維成又艱維施弗竟式乃有公則能死
南京國子監監丞林海峰墓誌銘


海峰諱啓字仰之六世祖梅溪自晉陵徙同安曾祖性
同為湖廣布政司經歷二子善元慶元慶元後伯氏子
清惠為仰之父母劉氏仰之狀貌魁梧性局軒爽不欲
一事事居人後與蔡郎中介夫以易學倡泉人其後相
次發解首泉人興易學以盛二門門生也介夫易尤在

泉仰之為安陸學正安陸之易仰之發也仰之悔不為
進士樹官勲微見已志盡落凡格不與學子毫絲交貧
而賢顧損惠之若罔知窘束在已以胡翼之石守道之
教為教尊降遐邇皆有仰之名要人之子弟偏州下聚
之後茂民以獲聞緒論為快兩考順天四川鄉試所作
成收錄士沈文華黎奭姚學禮王孝忠喻時數十輩稱
名人當道上其績殊等外艱服除遷國子監博士及門
如趨今韓吏部遣子授易遂三捷鄉試其一中禮部為

進士子嘗錄仰之名于方石祭酒謂然居二年遷南京
國子監監丞楊吏部攝祭酒當詣京或請它攝楊曰仰
之在毋須六舍生羣請之吏部為宜遂攝祭酒嚴公有
恩監故有饌錢費于公仰之曰是諸生故物也人給之
盡弘治壬戌迎母太孺人至居閱月氣痞發刺脇良苦
太孺人臨視仰之咬牙自制作無痛狀太孺人熟視曰
是忍也命就藥數日愈復發藥復愈勉視事為常一夕
大發比四鼓脉失詰旦面鰲色神采俱去子驚視曰其

如何其如何亟理後事以予深衣履來頃告絕矣四月
八日也生景泰甲戌十二月二十日年四十九倉卒無
一金師生德之為爭致襚得殯致贈尋得歸以年月日
葬感化里蚱蜢山西原配李氏子鑄磐紳簪二女郭顯
葉洙其壻仰之介而容方而不腐為文章有奇氣修于
身刑于家信于鄉黨朋友孚于兩國學道可壽無疑也
嗚呼予重得士既晚得仰之謂銘仰之耶其胡毋慟銘
曰蘇湖教弛頽波已而海峰竝立一柱獨支任物視良

梓職繩引計厥纖釐畫堵曲盡鉤玄棘隱鬼設神施維
實維有以歎以卑維道孔完維世恒缺維善不可憑維
命永絕有水淵淵有岡霍霍有玉斯藏維先生之風



見素集卷十三

欽定四庫全書

集部

見素集卷十四
五十六

詳校官中書臣瞿 照

中書臣劉源溥覆勘

覆校官中書臣汪學金

校對官助教臣蔡 鎮

謄錄舉人臣張仲芳

欽定四庫全書

見素集卷十四

明 林俊 撰

墓誌銘

封太孺人曹母李氏墓誌銘

弘治初襄陽曹御史有名一日欲言事懼貽太孺人憂
乘間及之太孺人曰生汝官汝事同也第為之母我存
念疏上果下獄賴皇上明聖得釋引疾又得告然設深

弁以須其入者縷縷焉助瀾揚波者或中以危言太孺人曰時必無是兩京大臣及臺諫時疏起用太孺人曰時亦宜是然非予樂也聞者服為賢今年御史走書來告曰璘母亡矣璘獲備人數中母百心之教也無母璘何恃璘奚生為璘母婉婉沉遲比幼見我外祖武功丞景公暨我外舅讀書輒竊聽心領間以成誦外祖母閭愛之年二十三歸我先御史府君時吾祖為襄府奉祠先御史攜母自尋陽來侍以孝謹獨得歡心吾祖死始

家襄陽或求分異先御史不可吾母曰母以予婦人故
遂悔不言如初處尊幼義而有恩從母孀居自守吾母
敬愛彌至嫁其孤女有丁姓者貧不能衣食母密遣其
鄰以意自給之久之迺知所從僕道得遺金遣就故處
歸其主疾亟璘憂甚母諭止曰世患天吾年七十有六
患貧且賤吾生長名門豐有衣食又以汝故受國恩封
太孺人汝復何憂惟備棺衾完塋域我死子孫毋失我
家法足矣言訖手麾璘出數四璘出氣絕嗚呼尚忍言

哉璘生無以報母觸罪惶惑上貽伊感母雖善割制忿
憂不見辭色心則何如也不孝罪大雖百死其奚自贖
誠得執事銘吾母猶得以傳信于後也杖而敢請書至
予閱視沮忤嗚呼予知侍御賢不能薦薦不能重為力
又無辭以章其老母之賢是重吾愧也古之道其或未
然按狀太孺人李姓諱榮慈淑貞專有性量善掩覆人
過故能睦有家生宣德丙午六月六日卒弘治庚申八
月二十八日子男琛英國公府教諭次即璘監察御史

孫敏學敏敬敏功敏德敏中女三孫女曾孫女各一墓
在鳳山中嶺先御史之塋合葬之日壬戌十二月十日
銘曰粵有滂母亦有班昭名齊美憾顧恐辱朝有美侍
御如金如玉振發精英伊母之淑孰教匪忠渙忍容容
孰教匪直拳孿頗僻惟式匪躬則亦罔克承風望稜稜
以莫弗欽訓之閑只德之令只詵詵子孫家之慶只垂
禎考則士也則難士也則難噫古之觀鳳之中岡蛇蟺
鬱結靡樹以封千禩同穴

白塘處士李公墓誌銘

莆兩庠人文望天下間亦有持其師短長以倨視儕輩
取貌禮成化間是風猶存者當是時李處士獨貶捐厓
角為讓氣卑色夷溫聲而跼步疑難辨析觴解縷分人
益心敬之於書善訓說叅覆背誦不遺落一字一句為
經義有意法有司試諸生廩率在前列次至率更人寬
其蹇至取作話柄為謔甲午名在薦中為易經卷擗落
庚子發解首以落判題主司泥成式又落乙卯子應舉

一試輒售處士笑曰是何坐我良苦而吾兒良易耶乘
除利鈍抑有數存耶吾誠安之遂解學籍歸隱白湖塘
上看種樹書鋤雲泛月醉則掀髯撫掌大言曰吾知有
是不僕僕書蠹五十年矣性至孝生事葬祭極其力所
能不以責兄弟為備教諭兄純死處士走永豐迎其柩
攜挈其妻子以還家祠之神室未立則完之書林之祖
墓失則復之祭儀祭田則又定之深衣幅巾出入族里
人始若怪中則安久則羣然樂而慕効之嗚呼處士居

家居鄉皆足取信重惜其居下積者厚而施者不遐也
龍薄玄間雨下土固皆魚之化也然化者常少不化者
常多其甲鱗鬚鬣誠有異耶其化其否吾不得而知也
然必化則龍龍則雨不化則不能龍不能龍則亦不能
以雨矣嗚呼士之懷負美器而卒不能施用豈獨處士
然哉諱倫字體信別號蘭菊主人李出唐遊擊將軍尚
昆之後宋殿前制幹富十世祖也曾大父文材大父有
命父斐母林氏兄弟三人處士居季宣德丙午十月十

二日弘治己未八月初二日辛酉正月初四日則生卒
葬之年月日也享年七十有四娶林氏生子曰紹曰素
皆先卒應舉側室戴氏出也有遠器其化其施其待于
是歟墓在延壽里上金山之原六窀處士林居中紹素
祔焉空二為戴與紹之婦壽藏應舉以南京刑部主事
吳君希由之狀請銘處士在諸生予晚進忘年相好也
吾子達又從應舉授經其昌無銘銘曰惟璵方不圓以
行惟澤卑不流以施胡不學輪而不學川惟器有所局

而用有所偏嗚呼堤決川潰澤售其全軸折焉斃患不始于璵之顛而今而後處士知免焉

故嘉議大夫都察院左副都御史周公墓誌銘

弘治壬戌天下諸司朝天子聽吏部而黜陟焉言者舉故事以旌殊尤吏部上六人其一吾時可也上決意用公而公以疾解藩務詞旨甚哀上念之進都察院左副都御史致仕馳傳以歸僅典也是歲八月八日疾終于家嗚呼公死矣前三年言者上才望議遷公名第二世

恒詆儒迂不涉事其然耶公由進士積官左布政使累
階通奉大夫秩從二品嚮道甚早年十六聞王千齋名
見焉朔望拜文忠烈周文忠祠下往來陳白沙羅一峰
諸賢篤意古學景竒節蓄厚而資以深行義甚勇於所
不可語鑿鑿以盡嘗主白鹿洞教四方士從者二百人
所至必求官理風教所宜楊龜山胡文定劉屏山朱考
亭真西山蔡九峰祠則修之林艾軒墓則又修之嘗謁
忠烈主忽動怪而求之則像遷佛宮毀于無賴若托之

公者則言之當道建祠優其家錄其孫子于學又言之
朝請忠烈從難諸人祠之吉郡上曰可蕭給事顯張主
事吉以言謫按屬公折節下之延見莆孝子劉閔席之
賓席而周裕其老母完至嗚呼是非儒為之乎教人首
性理次風節最後及詞章閩廣士習為變行部惠信都
勻苗為之寢謀刑名會律准經而間仍其俗曰毋第拘
為也東廣前政彭惠安為烈陳士賢繼之公又繼之薄
征輸務寬大抑浮靡定婚娶節縮採珠官積與公府之

煩費歲率損十五六又損溫戶二十不僉靜若山立動
若風駟權璫懾束不復迹故武居奇利功生人為多鳴
呼謂不涉事謂然乎諱孟中號畏齋更號韋齋廬陵烟
源之周自泥田徙仲良生子遜生詢是為公父終沂水
教諭贈南京吏部主事母彭妻劉皆封安人子統南京
刑部員外郎仲縉與劉安人皆先卒季綸仕俸倖侃其
孫公既孤事世父盡謹建祠堂增祭田惠族屬皆窮力
周事詩文有言志稿壯浪自一機軸生正統丁巳二月

二日年六十六其耄其耄其又何人耶嗚呼公死矣統
既奔喪將筮日奉柩下園啓劉安人之隧合焉泣謂予
曰公厚知先君子銘無公宜記貴陽連榻距今十八年
燈雨如昨晤言無日矣有道之涕其曷無從銘曰乾旋
坤奠岳峙川流彼古弗異曷道之尤存道由人有完有
缺一類俱紕廢食於咽策良循武遐軌邇而無然適薊
南轅寔施黨籍宿懼偽學載禁公始公終列帝之聖陽
誅陰訛公靖弗疑式時昭潛痛定之思

正奉大夫正治卿貴州左布政使黃公墓誌銘
普安亂既平揆事錄功黃公求我當進秩故事方伯進
秩中丞為常公資望已淹矣方須有新命則以訃聞弘
治壬戌九月十三日也生正統丁巳四月二十又五日
諱璉字汝器犀坡人入國朝犀坡第進士自公始黃進
士亦自公始甫為給事為叅議無遷者遷亦自公始木
訥簡野退然若農家先是時進士偉儀觀音吐洪亮無
南語則選給事公不得選給事及是擇才望為宜公選

給事署之戶科督後湖而南聚天下民版磨校之又職
言天下事公持大體不掇拾人小過汪直擅柄王越相
倚為姦利公率科道極言憲宗逐二人連其黨以盡其
為浙藩叅議提督溫處銀冶鑛故竭率輸自民以糧為
差新鑛間一出盜盤據之民重驚擾公曰鑛地利也不
輸諸地輸諸民天下皆治也獨溫處然哉且新鑛徒餌
盜奚功於國與民遂擒其魁散其徒疏言罷課塞鑛民
永永便上曰可公遂改雲南雲南糧屯出者十五六武

流侵盜漫不可為疏理公嚴限之歲輸告完撫巡上勞
績為司叅政貴州命已下矣三年進右布政使又三月
轉左累階正奉大夫正治卿公久在貴州夷民馴習無
間志賢練上孚而普安事作坐是不可遷蓋普安土知
州死妻米魯謀自襲毒殺其庶子生事者急之魯遂為
變官多被誣辱公長僚顧獨脫漂溷魯疏自直獨不掛
公一句總督軍務大司徒王公待之殊等供饋主畫公
亦力為之盡故評第功特加嗚呼公已矣是士夫之慟

也公靜定渾晦不市恩不養交不立崖異實常譽先久
以宣徹其視事也星出入為期嘗曰人須自立忠信廉
謹吾事也其升落毀譽吾寧知之因號求我歷清顯幾
四十年俸食贏餘以修先祠先墓周九族鄉舊之貧田
不頃增屋舊隘迨公之妻子亦莫不視為安固不知有
今日也有洪量在浙江以吏失公移為御史所中滯右
遷其後御史謫幕下公畧修怨薦之彌力所居望江南
村水縮公告守令鑿渠自小山抵巖沁引木蘭延壽二

水以溉田用腴又告巖沁更鑿則秋蘆之流可會二水
舟由瀨溪抵江上五六十里可息肩背為奸者所格工
中寢至今人吊遺蹟為慨曾祖宗道祖宏中父本清封
徵仕郎南京戶科給事中母俞氏贈孺人配許氏漏頭
仲熙之女封孺人公窮能織組佐家費貴能無驕能澹
簡以相慰助為廉先公一年生成化丁未先卒子詢義
官娶莊講邑庠生娶傳諤娶鄭女適林璵孫男鋸鋁鋤
鍵銘女三墓在鳳林祖墓之東十窰公與孺人居中側

室聶與莊與諤以次而祔餘為詢講與婦壽藏以甲子
正月壬申襄事以璵外父饒州通判漢之狀請銘饒州
人望也狀則可信然公豈待銘後傳哉窘突之筆祇重
愧畏而已銘曰海匯百流嶽收羣望高深不言誰則尋
大晦晦求我若訥若愚若遲弗任歲計乃餘今吾伊人
言貌疇信不凋不摧松栢受命公始諫垣危論瑱瑱天
子明聖公猷是經公來浙東羣盜結糾弗懾弗懲彘突
彪吼公赫三令如風如雷陶鼓簸扇磔其猾魁公功不

有柔惠且武除課蘇人召伯杜父維時浙人朝不謀夕
自公來只民以衣食公來自滇宿弊澄汰比安貴陽民
永庥賴公古循吏質簡而文維實維歎維蘭斯薰悠悠
絳旌鳳林玄夜公祠于鄉亦祭于社

處士吳東軒墓誌銘

弘治甲子莆令侯惟明奏最績且行父處士東軒疾作
醫之愈又作又愈竟之弗治三月二十一日也侯既視
歛事泣言曰莆名善治棺實堅以完無如自豫豫無如

士家則以干吾家翁諾焉喪且歸又謀所以不朽則以
狀授黃編修壺陰於俊請銘嗚呼莆方父母侯侯歸莆
失父母也無重處士慟哉諱靜齡字文安吳姓其先休
寧人唐監察御史少微中書舍人鞏其世其後居富饒
又居巖鎮皆歛地遂世歛人金紫光祿大夫其尤顯者
問學則古梅之詩孟暘之易學為盛德而隱則炎方義
慶月得處士月得子也有性量母某奇愛之比長隱于
商不涉為市之道曰吾治生無計然文無司馬子長輸

邊累侯無能卜式樊宏宋清吾志也故無詭局無翔價
貸者曲副而默焚其券所弗善酬居縮致孝時割所羨
贏施惠義焉有三子材所宜授之浩植有家遠第進士
即侯也子良淵永義方之承有師道焉故德侯之政而
莫知與為光使者旌官能上之殊等嗚呼處士亦自見
矣生宣德己酉某月某日配閔氏先一年生弘治癸丑
先卒及是某年月某甲子合葬某山之原浩娶亦閔
侯娶汪繼張女嫁方富茂孫瑯執觚之役邑人事也其

惡無銘銘曰士有寓傭亦有酒隱乘運脫蟠屠夫將領
吏良而商粵有寓言不市于道仕者永嘆豈直奇貨殆
托而逃雌伏處下降峙中高就養歲年疇窺其面默運
潛裨雨濡風扇公去無疾綸書昭錫公竟無驚甌越為
平維導有旌維次有祖維藏有神函壁終古

中奉大夫致湖廣右布政使事瓊山方公墓誌銘
公諱守字宜約號省菴既致布政事舊業日落貸于里
富人為常人曰二品官如是耶傳為笑世無義大夫子

念公不能助也作憐白頭寄之事頗聞莆二庠士言之
巡按監察御史宗君彝援詔例給廩又給田薦之朝未
報公疾作強力序族譜以不及置義田為恨比亟語其
子曰送老矣多讀書力了責交遊見素念我不及為別
致吾意焉弘治甲子四月十八卒日也生正統丙辰六
月六日沈裕雋永童州即老成為官保陳康懿公所知
遠大屬焉景泰癸酉年十八領鄉薦又十七年第進士
為戶部主事轉員外郎再轉而為郎中佩璽書提督薊

永山海延寧邊備錢穀出入易汙公獨不汙提督例一行効陞堂上官公再行僅陞雲南叅政部之長不能平以問王太宰介庵答曰謂不知方耶雲南措萬里荒外官解弛魚肉其民夷故用楊巡撫林憲副今又用方將更化于是謂繼宗及予也公在雲南與予同事金滄又同事司印予率直公濟以靜重以奉宣今天子無外之仁更紀其政人始知有避趨要人歲入損十八而餘賦歛就輕盜賊衰止故官之妻子脫流寓歸若籍者數十

家所在父老覩天日為快磨乃夷納流人萬人鑿銀礦
弱肉強食為邊夷患先事隱之予二人榜許首實人得
活路散患解除利輸幾五千兩城趙州橋下關修學立
堡賴焉孟密夷叛故主木邦當道右之孟密大縱木邦
危如綫撫勦之責付予二人時干厓怕愈奪印芒市放
旦放彬爭官讎殺連數年官無何直夷視為玩予二人
謀曰請自近始蓋實非專責也榜示之羣酋畏感縛怕
愈出印以獻放旦放彬囚首服罪於是刻漢緬書小榜

遍給諸夷諭以順逆禍福附者解體孟密勢轉孤悉還
故所侵地夷言曰事始如是奚至有今瘴作軫旋再往
遂定諸夷不平事輒從求直故無是也隴川夷兒頗習
中國語製儒巾衣擇漢人教之風隨還今學立焉每歸
夷官屬火伍數千走送或問之曰嚮撫夷至雞犬不寧
今官兵不敢近吾家是以遠送羅拜而別大司馬馬公
廉實以聞文告之諸司為勸王太宰亦錄名于屏風謂
公弟進士憲曰是而兄與林憲副齊名雲南者也巨璫

作金寶玩具極工緻未進而卒予二人議剔其寶範其
金輸之庫事雖弗諧廷直其議賓居賊發公往征部分
周整一夜營中驚卧處而靜由是僚佐服公遠畧算授
功成凱旋議立州衛許之是時少司馬王公詔繼巡撫
大司馬韓公文繼左轄巡按藩臬竝峙廉聲雲南有新
換一番官之謠壬子之冬木邦復仇為孟密所困公往
又定思操親犒師然深入歲數瘴毒所中耳目寢失清
予既更繁湖南公亦來為右轄官所心迹無不具知者

公繼母喪釋禫貧不可支親舊強以起至臨清疾加作
遂致其政方出長史禮部尚書琬之後徙瓊山學錄康
也曾祖積善祖夢周父休徵有隱行累贈戶部員外郎
妣王贈太宜人公和柔孝謹方上春官太宜人微恙即
解裝侍藥久之果不起員外訓以廉慎之詩昕夕佩誦
聲色澹若不立媵婢兄弟族里非甚穢戾無不加容納
鄭山之藏族惠感之讓也問學經義尤精嘗提調雲南
試公閱詩與主司連合十二卷其後稍叅伍率在取列

素所指授副使吳君昭僉事林君樞周君信尤顯者也
延綏響馬盜至從者恒怯公厲聲曰吾方郎中也盜引
去方議事城戍報急鎮巡錯愕公曰第先之虜驚遁平
居若無能為其應猝計類此配宜人蔡氏道濱希韓之
女性量宏敞在薊州能叱私謁在黃田正容祝天能回
風禍舟不沒能不事生財法仁施而義守以居於貧生
卒皆先一年年皆六十九葬之費則俊言之方伯陳公珂
少叅徐公貢郡守陳公效郡貳談公經相成者也憲為

知縣先卒宿負如公妻子告不給清白家法然哉子質娶王立娶黃繼娶林彥郡庠生娶俞女適吳祥黃溥王寧孫僑娶程价聘朱伍尚幼葬以季冬某日子不能評隲公其貧如其安如是是可知矣似續聯穎天之道亦將然乎銘曰維食勞公美且多維蓄有公大且久惡乎貧我公古人計非左財多基禍罷無歸匪公者誰杵不相無從奚慟士之觀敦薄廉頑

致教諭澄渚俞榕原先生墓誌銘

澄渚本陳俞迨林氏居而盛易澄渚今襲焉俞世以貴
雄其鄉其科第則榕原先生始瓌瑋穎耀治伏氏經有
傳文字清典可諗游提學試諸生先生齒獨少獨廁名
第一為常先是時邑庠第一人率落解先生亦落解屢
之特為寘名第二人曰榕原中矣果中上春官甲科羣
屬焉先生外舅楊叅政習風鑒法獨視不可既之辭乙
科竟詘教諭以行自力師道作春風館時雨亭禮樂射
御書數六齋獨制鑪鞴所作成泰和應山二庠所收錄

淞東西十一郡士率異常觀言者言教職試進士為例
先生業再往再格不得預試取道徑歸歸二年上章致
其仕作百詠詩以收之寂祭田益之子姓才而賢教之
三族婚喪助之家故饒盡割為義或費為草堂假山方
池奇花竹名草複疊疎整取足暢神情不復假他出為
便予嘗兩履勝處再往而再忘歸焉生正統丙寅五月
六日卒弘治壬戌正月二十日又明年正月十一日葬
紫霄半山之原諱釗字時勉曾祖德俊祖文道父邦才

義官母陳氏配楊氏子應星蚤卒應辰鄉試有名應登
應第時煥後應舉應嘉孫男正宗直宗榮宗女二應辰
以通判鄭君徽之狀請銘嗚呼先生宜進士而不進士
教秩年勞高之取御史次之亦不失美遷先生弗由焉
官二十年所歷不滿四歲薄之耶其非然耶其所樂不
在是耶銘曰木爨而焦或溝而斷胡業巨棟雨暴而海
或山之巔胡功甫田宋襲燕珙楚荆和璧售偽汨真曾
是物色龍失而魚鼠化而虎消息縮伸宰物宗主吁嗟

榕原式美以完隆施顯授萬頸俱延起起扶搖載前載
却縱弗盡翰舊棲任獨韜芒毓浩艮坎式怡達人委運
生死於斯紫霄半峰盤鬱融秀以妥以藏若考在右神
物發靈錫有孫子錫有孫子公永烝祀

見素集卷十四

欽定四庫全書

見素集卷十五

明 林俊 撰

墓誌銘

承德郎岳州府通判東臯陳君墓誌銘

君諱愈字師韓姓陳先姓鄭南湖三先生露之後至正間君高祖四秀由陽城來贅東臯遂從陳姓曾祖孔順祖楫俱有隱德父希玉母許氏君生景泰辛未二月二

十五日十月喪其父時許方二十有三歲孤弱一身飢寒在其體亦奚恃以自固耶以有君望耳謂容弗嗣而去許以死弘治癸亥五月初一日也嗚呼痛哉君羣兒時軒特雋永時若有所思許心私器之既就學季父邑博君鑣諸兄挈壺君師烈又器之比長從太守朱愷授經又器之遊刀學割盡得其肯綮中成化癸卯鄉薦志養自謀不樂乙科既竟不得進士居益貧時許年亦七十則嘆曰宰物畛域我也就吏部試通判岳州迎許官

所入色養出則服官政湖南民困賦重催科吏復入常
例錢椎剥肌髓君易前絃民蘇賦足尹大老聚徒鈔掠
洞庭間商民患苦君用裾縫法擒之和糴靖州邊餉督
造內供歲幣皆以能被殊委撫巡有嚴正勤密之書疏
尋登而君瘡疾亟泣謂許曰吾母守兒志竟莫酬又無
丈夫子以後吾母老無聊兒何以死又謂妻朱曰善事
母以堂弟某之子陽春為後言訖氣絕郡之守貳與屬
之士民無不盡傷者君六女長適王恭甫次適朱子御

次適林道明次許林世槐其二側出俱幼喪既歸卜以
甲子十二月戊寅葬安樂里瑠山某向君內兄朱君謙
狀事行託銘掩幽之石嗚呼德門也貞婦也賢孤子也
考常論世詘信相乘之大機宜昌以壽也即未然亦遽
宜絕以死耶事有不可曉者是類也王屋謹嚴神不福
謙丙吉國絕天道之不可信古今事有終未定者獨君
然哉銘曰易系貞亨書紀善積順修乖應值萬于一頓
緋肩峙有葉有年不循彼武于茲迤邐地老天荒蘭摧

玉碎泉臺掩幽岡雨晝晦滔滔逝川迄迄洪源厥初允
念世隕若存

龍樓陳立雪甫國泰合葬墓誌銘

龍樓涵江望聚陳望姓居則龍樓也鰲山陳葬所國泰
志自近也立雪藏石配俞氏藏左子樂賓祔左嬪余氏
又祔左合之四窀也立雪以學古自命立懦律貪為己
風槩甫弱冠即開義塾賢問殷殷固已得張弛之大端
人用老成之庸謂其僅天以死耶俞時二十五樂賓時

四歲二女呱呱身後事大若不可憑庸知俞能力自矢
完有節能立有孤如今哉庸知樂賓能成父志裕于躬
以發于其子如今哉節則難身則可保也教則無難子
則賢不肖則不可保也俞豫知陳之澤未斬立雪之賢
必終祐斯自據也立雪有佳弟尚明君嚴鎮有古法樂
賓內承賢母外承賢介父又外承賢師友之麗澤薰蒸
志尚孤潔遊郡學有時名一日見母疲家政痛不自安
謝歸養母與余共子婦道儀厥宗姻責厥子世傑以光

復陳氏酬先志焉陳出少府本之後嘉定戊戌致政日
新自莆城徙居龍樓五傳而至孟方又至以進又至貴
華又至立雪又至樂賓立雪諱夔字尚樂生永樂壬辰
二月二十七日卒正統丙辰七月十三日年二十四俞
生永樂辛卯十月二十日卒成化乙巳十二月十五日
年七十五樂賓諱竣字恒雍生宣德壬子九月十九日
卒弘治乙卯三月二十九日年六十四余生宣德癸丑
五月初三日卒成化甲午十二月十三日年四十二癸

外葬立雪庚申葬樂賓葬余今甲子葬俞世傑由鄉進士為無錫教諭應聘為考官尋應薦為池州教授既過家泣且言曰世傑以十二月壬申襄我祖妣葬事惟葬俱未志滄桑變滅有餘感焉謹以為累予聞陳襲有魚蕩之利以高貲好禮聞鄉閭尚明君子及識魚魚雅雅居然處士風致以故士夫道涵江必過龍樓過龍樓必陳氏陳氏衣纓雖再續郡博而門巷車馬上世已然立雪三孫長郡博次世顯亦為揭陽典史次世純曾孫銘

曰善可憑有不可憑而可終憑于陳是徵

黃巷黃君儀韶改葬墓誌銘

莆重士族在涵江宜莫如黃黃宜莫如黃巷桂州刺史
峰始遷祖也新府則樞密使鏞賜第鏞弟太子正字三
傳而至朝奉生元良元良生甲仕甲仕生孟章娶陳氏
正統己巳生君二月二十七日秀特神朗有孝性其治
舉子業也有聲輩人遽則夭死成化庚辰十月二十九
也年二十二去上殤一等耳新婦李足未盡黃閭闕其

奪其守其未可知也其所恃者孤筮孑孓脆在襁抱其育其否其未可知也李之志自知耳人則誰信之雖君之父母與李之父母亦未敢謂必然居左之葬同穴之先備李其不忍去君以示所不二如文叔令女無疑也壤寧知利不利哉黃安合璧寧知業改卜如今哉予重悲李之責之難而君身後之幸也宗祊弗嗣李未可告也文獻中謝家以落未可告也弗章顯以光大門戶可告而未可終告也今則裕為之丈夫生而漸盡者例有

之寒弱一婦人而聞于鄉標揭于郡上姓名天子而聽之褒嘉垂及焉君得以附名其間以久則未為終不幸也君有父母李孝養之歿禮殯葬之有弟妹成立之族之子未晬而父母死李乳鞠之仁視若出已易名文驚長而誨諭之納之室而復其故產于常苦若甘履險若甚夷重若弗耐而若誠安之蓋棺事定今而後可以藉手有詞無愧容于君矣人則誰弗信之則可謂難矣予又悲孤之責之難也罔極之報其百常情矣乎君與李

重無憾矣君諱鳳字儀詔李諱肅姜望江墩上克忱之
女莆田令丹之後其生丙寅二月三日卒己未正月九
日孤文驚鄉進士稱家兒者娶姚繼娶方女適林環遺
腹出也孫應魁孫女三人俱幼癸亥之歲臘月壬寅文
驚遷君而以李合葬則以諸兄教諭文璋之狀請銘銘
曰惟黃世先文與接軫派于裔姓或韜以隱君如鄧林
勁直賦理亦如出日亟以風雨境樂而悲何惡何慕惟
父母躬寧母我顧我有孤孺惟脉之遺有如弗卹執言

之思妾心匪石亦則深井弗轉以搖吊時隻影寒餓事
小中矢靡忒兒利用賓孔懷伊感黃安仙原名實該副
祕幽會靈永錫祚嗣

贈承德郎太平府通判談松軒甫墓誌銘

南海有隱流談松軒甫完醇居晦縱傲之芳洲碧樹之
間引身淵龍送目冥鴻脫泥蟠而橫雲表無患其不能
至也而樂不在是嘗恠夫士者離親戚遠鄉井而去之
京師一顧價增而賈用弗售亦屢屢矣食官蒞局大吏

者寸寸而約繩之亦勞以東矣吾有吾樂焉學不求博
求其要道不求其深而求其自合經濟一身而施之一
家之政父母順焉兄弟妻子宜焉鄉之人悅而信焉斯
而已矣甫盡子弟道對妻子無雜言妻梁氏女間訓大
家亦善順適勤儉以立有家嘗拾遺金環付其主甫曰
良吾婦子經舉鄉薦為通判為同知清約畏謹奉以終
身得連被旌命甫曰良吾子弘治癸丑九月六日甫卒
數月追贈承德郎太平府通判經初官也諱誥字以道

梁諱文德封太安人既專家政一循甫舊規經念春秋
高不忍舍去慰遣以行故經在莆郡幾十年不攜妻子
甲子十月十四日梁亦卒壽八十八甫捐其十焉談故
江右萬安儒家寶祐間應奎牧循州遂家南海平洲蓋
其地也生時雍時雍生文貴文貴生稅長稅長生康護
娶麥繼娶梁生甫子即經又綸又綱又紀孫佐儲俸仁
傳侃信儀任曾孫道泰道亨侯既奔梁喪以乙丑某月
某日奉甫合葬大羅岡祖塋之左以狀請銘予聞之良

玉不斲醴泉不和其貞色露味有天成者樗雖散不逮
梗楠斧斤有間矣井之澤不逮江淮河濟覆溺之患又
有間矣故莊周上無為以敝敝人事為破樸拙如甫者
例可書重之侯子厚銘能已耶銘曰蘭膏自焚办芒先
缺逸足健羽折翰駭轍達人高致沉落光耀弗繫世憂
已辱奚召棠邑貞晦南陽德公真風罔嗣甫或無同平
洲大羅松雲自樂生斯死斯仙兆斯卜有韙太丘奕葉
昭美哀石勒潜言告孫子

中奉大夫致廣東左布政使事林公訥軒墓誌銘
弘治甲子左布政使林公訥軒卒明年葬資壽山其孤
禮致憲副黃公熒之書請銘嗚呼渾樸解完士之趨日
以下得見尚古者斯可矣公與吾郡黃公汝器方公宜
約同時三方伯俊所畏也前歲銘汝器去歲銘宜約今
又銘公老成淪落有餘感焉公初諱大同後從里辟為
同進卿字也漳之文山士家曾祖瑩中祖仲謨先生事
經賢父也鄭安人母也秀臞高骨氣定而神閒不為習

俗嗜好道用晦昌事以誠久基遠功而畧近効故恒信于所知而詘所不能知由進士為工部主事改戶部轉員外郎郎中兩列最書一膺勅遣既有江西布政司右叅議之拜信所知如是焉所不能知有廣西之調既又有浙江右叅政廣東右布政使與左之擢藩服大致然也不舉于彼舉于此而優于職所逾重詘公者無重以信公耶公始遊從祖邑博澹齋繼游從父邑博默庵于湖專志理學久而過之不欲外自異文公禮呂氏鄉

約奉以終身故所至諭行無間二書與北溪文集字義
蒙訓竝梓傳而廣焉靜鎮躁正辟邪嚴佛事火葬之禁
毀三教歸一殿修來學雄學遷文山觀瀾書院公之任
也新宮政澄吏奸汰倉弊按飛洒之豪戶加額之運軍
脫伍之戎籍與保定之平糴價停屯徵蠲夏稅減柴夫
馬匹厨料軍需增月糧罷河役存活二十五萬口而餘
公發用之通也監收監督鎮守皆巨璫公不為屈兩廣
臺臣藩憲有跪禮公不行卿貳左轄之階公望復大起

不少須以致其政介也拾遺金還之故人餽涉非道卻
之俸入親與士夫之賢生有給死有葬陳憲副冷庵之
貧張吉士紹齡之死尤加厚焉默堂之塋視差父弟某
姪祺之教愛無異視子大宗之祠堂先正林梅雪之祠
堂陳方伯選之墓表又手立焉惠與義也暮年委情林
壑輕健若童子身家重若無官所居樹生異花臭如蘭
色如蓮彌月則落落則公病以死五月初四日也嗚呼
物之鍾異蓮獨稱君子蘭清修所自況公無是兆邪鬼

神若信之矣生甲寅十二月二十七日配安人徐氏有
賢行子即禮嚴出娶葉女三黃琳蔡烈王翰其壻禮琳
烈皆郡庠生孫獻其葬臘月甲子銘曰燕紀刻棘齊頌
炙輶腐或楮拘達迺蟹躁粵有握瑜天日自矢蘭化弗
芬我擷其是嗟嗟訥軒志潔行廉洞視底裡虛明坦謙
官以恬起亦以施貧大醇縷脉流風此真悠悠北南徑
途川曲盍起典刑永觀漓俗

刑部主事黃西溪配安人吳氏墓誌銘

黃西溪主事刑部時也廉白有聲入其門縲車軋軋徹
廳屏主人諭止止復作它無是也約客皆出事目酒出
自製肴核釘餽叅新故物而有僕馬之需視時之登歛
為計一年予以知內子之賢其積贏也以儉相焉連數
日西溪哭一子一女女安人出也安人哭子而哀對慰
者言是重難忍三十年佇結慰意是兒方潑潑跳走兩
睫間新歲擬遣就學門戶委付焉曾是殤死人壽命不
可期呱呱黃口又將敢恃謂子瀛也自是百志摩撫熟

視其冷暖飢飽之節易垢易濕備出手業而僅乳于所
生今林氏也西溪歸省安人事舅主事翁廷言姑林安
人婦職備焉西溪還京安人請獨留侍瀛時方却乳罔
知身所由出也樂與偕留林竟莫可挽致西溪死保瀛
益專以義自割不曲庇外家方林二女不溺已生之愛
或則有隱界之疑既之家不落屋以尋菴焉日惟瀛稚
弱疾病惴惴恐不及其成冠始喜林氏婦入門又喜孫
應福生又喜一日闔門半面拜予女嫗抱弱孫不立若

將有所諭已而知欲昏吾孫女抑有托也嗚呼世有寧
老死不畜妾坐絕人後倒囊女子無分寸遺庶子落莫
不復憐視而身亦與及焉視安人之風毋厚愧邪文峰
處士德溫之女西溪既迎相主事翁喜曰吳氏女多貴
鐸偶新婦其福之符既果得婦道母道甚父子夫婦恩
數人及焉淵靜無翔語理勞應猝如材丈夫十許年連
治西溪與舅與姑三大喪葬均致厚勤而處極整暇以
予殯西溪故兩家內交若姊姒然孰謂女婦人能記人

往德如此哉其生正統丁巳四月甲子弘治癸亥十一月甲子年六十七而終又明年十二月戊寅從其夫葬黃上世由七步徙龍坡最後桐巷主事翁啓卜焉西溪字文器諱曰鐸婦則宜城縣令曰典之女壻方曰繼仁林曰曰欽孫女尚幼銘曰黃一再世甲科四膺文與仕幟電睽風稜藩臬重僚曹郎內史門高立難矧乃女婦牝吻晨亂螽斯失聲義生弗忤乃復斯鳴有淑若人閨儀與與戚疏賤良處得地所植孤褻事母婦道常以書

以銘教熄之傷景祥之山黃墓叢立冷風白楊過者心
盡

先妣黃氏壙誌

封安人黃姓吾母也在東里稱賢女吾聯桂林稱賢婦
又稱賢母年七十六弘治癸亥七月二十八日卒十二
月葬雲庄聖塘凹處二十一日也生宣德戊申十月十
九日男俊侃傳佐僖孫達遇適遶適遠近暹達週吾父
主事翁命瘞誌石復納是磚于壙嗚呼吾母古丈夫之

賢而女者侯唐何加諸其百世祀其是山相始終無疑也後泣誌

明太倉處士周君必章配陸孺人墓誌銘

司馬涇崑之東鄉故地今太倉州屬焉周與陸竝涇東西而居孺人陸君旺季女處士周君必章之配今知蒲縣事侯母也周盛時族分而四號四周村侯高祖安二曾祖子祥農業自支至祖海而家益落處士既早失怙恃又為尊執所漁斃子無倚婚媾固已後期旺無丈夫

子謹圖沒身之托熟伺之知必樹立遂嬪孺人于周屬
資產為地時孺人年十四老成自將承接進止有令儀
獨手饗爨每坐必有業隣壁不聞詬怒之聲惟紡車軋
軋連夜分為常二門竝恃自振旺終事處士誠力焉處
士沒孺人獨手內政男室女家教子程法如處士時弘
治辛酉侯就試孺人窮百晝夜得十縑為資是秋舉子
捷至乙丑進士捷又至落門崛起孺人安習無輕容年
高而子貴仕執勞猶故一日鍼綴裾偶刺入膝瘡潰為

風所襲竟弗起正德丁卯六月十二日也生宣德乙卯
八月二十五日子溥娶張廣即侯娶張繼娶夏博娶朱
孫希淳希濂希范希淵添書希淳州學生女孫女俱二
侯方八月于莆近古之政予合焉孺人之憂去焚浮屠
彌月滕口者因神其妄孺人生未嘗信佛固了了也世
嘗疑昌黎潮陽之行為疏佛骨不知前是之三左官誰
謹後是之三右官又修何福也六一之本論致堂之崇
正辯闢之亦勇矣不聞何謹則果誰欺歟孺人適值之

也吾儒事論當不當不當論禍福況萬萬無是理耶侯
歸柩金溪以某月某甲子從處士以葬以監察御史陳
君茂烈之狀請銘銘曰老樹悴枝有落舊門天至柔貞
共處艱屯中違所天載仆而起氣奪雄夫誰則婦女母
婦之淑維梁維陶計厥易難陸百斯勞滯途僅亨榆境
罔待手樹手收窀穸斯快

見素集卷十五

欽定四庫全書

見素集卷十六

明 林俊 撰

墓誌銘

明將仕郎南京武學教授黃抑齋墓誌銘

抑齋黃君骨清神奇肌理玉色瞳漆若祖山藩叅議常公慰意是孫抱而撫之命名開顏屬其父麟母吳氏與所生母曹氏謹視之公年八十六垂絕盼盼尤在是孫

九齡君稱孤又數歲頽然長家塾席不一煖即入臥內
否亦二母呼而入之矣日約以時而計僅二在外勸之
勤唯唯叩之書善講解所攻課善辦私恠之亦私深惜
之意必將漫漶孤質美無成者不知其晦而靜為養之
深也後十餘年戊申予過家君儒巾衣來謁已籍籍時
名已酉省闈已巍然上第丙辰始授蜀之合州學正凡
蜀之士夫與仕蜀而至者皆推君為賢部使者以學行
異等堪風憲聞且用之屬南京武學缺教授遂以屬君

凡京之士夫與仕其地者又推君為賢成國公朱公大
司馬韓公且疏用之弘治乙丑五月君疽發背弗治寔
生天順戊寅三月字公悅唐桂州刺史岸公之後由涵
江來居桃源世稱長厚君曾祖贈工部員外郎震公始
徙義井叅議公生桃源老義井君生義井今烏山之下
居焉溫永有局量出言有章不少厲詞色加人人皆睨
善受之事二母以婉順聞念身早孤父事諸父盡已業
為了官責而別傭隙宇以棲其妻子無戚戚容叅議公

墓草三十餘春秋君始買石丐彭惠安公銘其墓而父
母銘述均致名家未解褐時也嘗落第羣輩養羞君與
陳侍御時周獨坦遊長安以觀榜出居官口不言利教
法先本後文誠動而詳處之所至材成勲貴子亦束無
肆同僚慰懌安處于其下郡大夫敬信劉憲副時讓初
署合州服有養郡乘屬筆竟傳為信性樂竒花竹官寓
時致自娛所翕翕顧澹無取吾聞君子不自大其事自
卑而人敬尊之君其毋然乎畀之壽文教可知也隆受

穹付通方而成務又可知也研景斲思搜要而纂玄叅
諸家而儀來雋又可知也今皆重違焉一子未孫蓄而
遲且昌以大冥冥者可信也丁卯某月某日寔君于墓
虛三樂丘配林氏子河清婦陳氏將合且祔焉銘曰鳳
皇左擘亭峽東四神八國萃隱窿曾祖考叔世在中戊
乾吉土新幽宮匪塘夾澗靈竒鍾鬼福孕祉荀八龍

明奉政大夫浙江按察司僉事柯山柯公塞軒
墓誌銘

塞軒諱燉字在亨柯氏上世晉江人石晉時大理評事
寶始入于莆居武盛六世念又居金橋七世舉又居柯
山舉由咸淳乙亥貢士為管勾官是時族屬衣纓甚富
入胡元無仕者國朝景泰辛未贈禮部侍郎公竹巖崛
起大魁成化丙戌公再起進士時年二十五以氣自豪
羣輩錄錄無足當其意竹巖弟之鈞冶簞扇無遺餘力
不踰年公詩大進奇警處頗類竹巖既為大理評事為
寺副刑名練歷為卿貳所賞奉旨按邢侍郎等獄兩廣

慮囚靖江府勘事奏當無不稱上旨遂擢河南按察僉
事未上丁先評事文甫公憂起廣東又丁繼母陳孺人
憂又起淞江綜煩剽劇事任有餘力提督銀冶易汙公
無汙易誨盜公至亦無盜兼攝學政所甄錄士多時名
有大魁者才高任已不善為韜晦以招尤忌飄然南歸
賦詩所謂浮雲飛盡見青山者志也亭名拱北示不忘君
也公雖久于官田廬僅取自足於時既不合乃一寄於
酒樹幄草茵盤礴野飲大醉則把筆賦詩睨青天盼望

海雲豪吟大叫若不可為繩束而居常訓儉整暇條理
聯疎戚調孤嫠延引後進迨老無少衰先世遺文若舉
公夢語欽公採薇集皆鋟梓以行己亥修都廳辛丑續
家譜弘治甲子又構祠堂落成飲懽疾作弗治臘月念
三日也生正統辛酉三月六日曾祖伯益祖守衍父即
評事公母林氏繼即陳氏配李氏繼廖氏贈封皆孺人
子代娶李繼娶林女三孫女二丁卯臘月壬申葬公海
印山評事公之左百步公窆中李祔左之左廖虛左代

虛右林虛右之右先事代以狀丐銘記大理時予備員
刑部晨夕聯馬公以詩自負一日戲予曰毋欲爭我頭
地吾狀元本也撫掌大笑方語合則有河南命矣公用
雖不究于時而溪山雲鳥自足寄遐蹤而抒情懷香山
之社俊亦足侍几杖而偕之遊今不可作矣吾聞負高
世之志者顛頓一遇詩工者能窮人公其坐是與所著
有塞軒集若干卷錄囚奏藁若干卷太平會一卷一椿
更號云銘曰物以明累亦以晦完退步樂法名爭必先

飛不盡翰趨不盡趾徑荒途迷林慚澗恥有琴有書亦有杯筭白石事樞間雲性冶拱樹齊化孰暝孰涼孰是通塞泉局夜長

龍坡林母謝孺人墓誌銘

龍坡之林其遷由孝義又由澄渚則邵州之後昭度之派凡二十有四傳而至贈都憲公良弼弟從弼公死配李氏忍貧育孤以立擇孺人婦焉是為尚實君孺人龍井謝氏安陸學正遜之女嫁具既已廉薄而林兀兀僅

老屋無宿春之糧孺人身專振落之任夜紡晝織車梭
無絕音以林素儒家子有年奇穎可就也節縮學資遣
之訓督而哀既稱未亡人姑老病子女連次以長陳氏
婦入門二女嬪于王世節黃大經之家畢力挽拽幾若
不可濟則有年登省錄就乙科領有蕭山教事婦姑相
慶偕就養官所每具一丈衣水陸芳鮮之食孺人曰汝
祖汝父寧識此耶則汪汪淚下有年亦淚下以不忘貧
賤之教也安分職為常孺人再就養東莞子母相對弄

大造大閑二孫甚樂既之有年請從東所張先生游許之脫凡領要趣尚日加尤為莞父老諸生推重及代猶言之當道請留孺人執不可抵家閱月病革正德丁卯七月九日也十二月葬龜紋山啓尚實君右藏祔焉生正統乙丑二月二十二日享年六十有三有年既得日來言曰有年以族諸孫荷知愛吾叔銘無妄可恃以傳杖而敢請嗚呼孟陶程呂所以成其子之名者母之功母之境有孺人之難者乎固不得不深念也孝子錫類

從弼之不幸昭度同也李無翁之烈有年之立與嗣先
嗣宗之立無異由今視昔有餘慨焉噫斯林所為立也
銘曰甌罄貫殘左泣右號孰是拮据母氏劬勞穎出鋒
銷規循矩蹈孰是淬磨惟母之教卻鮐勵清九膽勵勤
孰是母子亦偕於聞嗟嗟孺人無古是似我作銘詩亦
告人子

明橫山處士林覓隱墓誌銘

龍泉東走而山以地異中擘一枝而西轉而北南面以

臨于壺古荔丹實香風聞數里所謂橫山也吾家處士在焉處士非隱者也諸生時從吾祖教授授經同門之士連陟釣要次之亦不失師儒官處士竟蹶一遇得一廩亦為有力奪去久之解學籍侍母覓隱所以志也橫山自斷事公潛之弟頴通來居居而生處士龐阜秀特其將有鍾先世主客祕監刪定茶幹四忠義一門所以基林氏者甚厚司農卿父子榮遇宋元之間朱紫賜第奎畫昭回處士早孤善奮嗣其後若有當者力足以濟

時艱而僅完故業脩上世祠墓數事行足以移官理而
僅收養母之孝立弱弟妹以成智僅解鄉聚之禁而被
物之惠僅周族姻其最大僅董永豐五官二橋大役而
已夫遇險而舟擅其任遇病而藥奏其功遇旱而桔槔
受其巧遇寒而纊挾其執大盜勦敵而刀弩戈戟始收
其利其不過則無因自見焉處士是也既覓隱其友黃
方伯汝器為輸義易冠服處士笑曰無苦繫縛患我強
之加則從去則易去治命從處士服以正其終嗚呼賢

矣諱琛字宏璧行慶五生永樂甲辰十月年七十八配
徐氏宋狀元鐸之後知縣資用之女先二年生後六年
以卒媿賢俱壽人稱其難子伯曰景叔曰裕俱早世仲
氏祐克嗣書香教三子嘉懋嘉惠嘉慰士業鍾靈衍盛
庶具在此正德戊辰合窆卓靈社之雞山因誌于石使
納以俟焉銘曰林系晉安載起侍史通議有嚴孫子濟
美主客再世死義四人祕閣宣撫亦時勞臣公篤著存
思皇祖考業精行成尤收若左公有宅居介是箕穎雲

物悠然我以歌咏有美中饋舉案眉齊榮公之母北郭之妻德星夜沈鄉閭有慟來會萬人太丘之葬有石樹笏雞峰之西雙玉在中名永山齊

明儒林曹母孫氏墓誌銘

吳之儒林封主事公曹理母王氏以產本歿產中時珍方三歲理再歲本未月姻黨吳繼無子求乳本以子父獄諾焉猶日夜哭慎所以母二哀者曾祖菊庄士遜祖裕軒瑾念之曰無如孫也可孫孫女而曹錫聞順之性

習之孫且成之曹也孫繼王而母果慈二哀迨舉玃而
慈無異年二十八喪所天畢心和敬用慰浣其舅姑以
紓其喪子於鬱之懷衣食其三子必均序必先珍次理
而後及玃或疑其矯曰分固當是且珍理無母子吾子
不得與偕珍中殤哭之慟玃且長巨姓錢公器請贅為
家壻舅姑有難色孫曰本且人後妾子無足獨留且錢
曹偕里閨玃雖贅如不出其家若既受錢產理受全產
于曹立易易大人許焉從之主事既歸李安人孫昕夕

盼盼尤在是婦而摩弄其鏤鎔二孫錢氏婦在錢愛若
後焉治舅姑喪葬事祭先祠督教孫子臨蒞其婢僕下
人皆有恒法貞芳之節比老弗渝有司欲舉以旌孫不
可曰蘭立諸孫無一光大門戶直須吾婦人耶主事為
請止既之鏤果第進士為翰林庶吉士刑部主事員外
郎主事安人皆被有恩封人服其識弘治癸丑八月謝
去已巳正月葬東騰從夫封也生永樂癸卯十月壽七
十鏤既郡丞吾莆奉主事命丐銘于俊嗚呼愛惡發諸

情而根諸心者也吾子則慈前人子則不慈情以心異耳完財故業前者在吾者不可以獨據而有也夫私生忌忌生妬而易慈仇視而陷者百心焉孝已之事是矣故曾子不復娶顏氏述繼妻之慘以為門戶之禍夫無憎則幸矣況望其同仁耶望其贅其子而付前人子全業如是耶是尤難者是可以風世矣孫先世叔翁在宋為迪功郎族望泮溪而大觀者壻曹子真氏生良玉孫良玉女諱端貞云孫女嫁黃堂曾孫曰某曰某曾孫女

某銘曰兒寒異衣兒飢異食兒操履霜母心匪石古翟
耀聞曹乃孫氏夙違所天之死靡二均氣同父孰後孰
先孰忍厥生以惠于前維烈維賢孫允女士系實掩幽
木蘭逸史

明平海衛左所副千戶鄭西莊墓誌銘

西莊諱端字秉直漢中南鄭鄭氏祖茂以武功授寬河
衛副千戶父春襲副千戶調平海之左所從征沙尤寇
以歿君例歸寬河孤且稚也聽平海而家既襲官追訟

廢學從蔡行人元美授史質經義于士夫久之熟七書
辯識四聲奇字旁通天文地理醫卜星相諸術按本草
識藥物性味投單方疾往往愈日亭午坐予草堂風拔
木發屋甚怒君曰風以申止果止念恒信病亟君燭曰
鼻準黃色不死史崇明駁之君曰公旬日死或以為戲
君曰不戲果旬日死林元佐過予值君辭去君曰毋林
主事耶不二年無嗣死顧文儀繼至君曰公家頓落落
且死事後良驗所品藻林都憲秉仁林僉憲長深黃翰

編子敬數十人俱應性警慧揣發幽秘明炳幾先畫事
纂言時出新意惟不屑其類人文士屬心而同輩妬嫉
如仇兵仗例出堂委選能薦君中之也君挈家來蒲寓
官局朝督夕課盡色物綜理器精名立公暇走縉紳商
較文事趣詣有加劉東山異之曰鄭某居三邊取叅副
如拾楮既辭繁委一刊落官累魚尾爪田陶然野意縱
浪于西莊水月之間買地石獅山以葬祖父父母既未
疾趺坐矮屋窮日晝蠹簾內無人聲既落莫仰屋嘆曰

交遊相念惟見素一人嗚呼君其知我矣君武而文仕而亟為隱寓脩飾于縱俠解弛者流以自立夫例觀之異盡其用宜有足觀斯特傑所扼腕也壽壬戌歷弘治辛酉一甲子君固謂然既果然母韓氏配張氏王氏子士烈娶廖士勲娶魏齊聲衛庠士烈例襲官疏于朝以假其弟今士熙襲焉亦君志也娶尹女嫁衛鎮撫胡玘恩生林有恒千戶段銘戶部主事宗卿其一未行孫男弘基女二正德戊辰十二月奉寔祖塋中左之寔先事

士烈狀事行丐銘銘曰居而同異擇而異術而精奚授
奚試有拂于伸則匪屬人有行若後奚必若身惟歿以
永存考觀斯文

明瓢湖居士鄭朴軒墓誌銘

朴軒諱世興字孟隆行元一鄭姓陳隋時南湖三先生
開先莆學功為大宋溪東湘鄉溪西夾漈二先生繼之
為莆文字著述之祖莊後也溪西由唐殿中丞上騎都
尉方遷公析居迨夾漈裔孫慶始居瓢湖六傳而至元

偉生球領永樂丁酉鄉薦官臨海教諭以卒球生勤娶
方氏正統辛酉生朴軒弘茂簡遠父母奇愛之為擇佳
婦久之得劉氏實少八歲而夙性老成遇事了了百勞
有餘任家帖安之朴軒年三十三死劉年方二十六子
渾四歲女六歲二夫弟仲資李英俱稚兩世四孤劉獨
身門戶嚼牙結頂粗衣大笠冒風雨撶觸虎豹出深林
以循溪陂指授田作無虛日征稅之輸吏無能隱為羸
孤少長遣就外傳山迴水斷草屨六十里入城非歲序

不容一歸既授室量能付業仲資湮補弟子員季英補
從事德門爽佑不數歲連天湮之婦方方二十九歲孫
聞喜方三歲聞詩方數月一門伯叔非寡少婦則孤弱
之子女劉能礪以守以再樹諸孤難矣哉已未歲儉無
賴羣集將傾其倉庾以去劉溫言飲食之期旦日授粟
夜遣佃夫召近鄉凌晨畢至徐諭之曰遠來良苦粟視
城估損十之二驗直責酬衆袖手去乃約以螺為驗一
螺鳴則諸鄉螺俱應負鎗弩疾出後有罰是歲竟無盜

或謂有洗夫人之烈智且勇矣嗚呼孰謂亦五十三卒
耶官政弗肅旌典行而家為落天下之遺節多矣劉是
也予與渾連襟故知劉特詳渾字孔鎮溫永得子道其
卒弘治丙辰年二十七正德丁卯聞喜年十四始受成
于方坎株林之原午向又明年始克葬三喪女嫁瑁山
蕭琚銘曰孰謂質脆望零秋先有拔其株松栢弗年孰
謂質堅以鼓以鑄百鍊之鋼誠臣貞女維橋及梓載生
弗辰閱世俱促以隕斯身劉如烈夫以勇以健任寄疊

稠古今罕見有危如縷有冷如灰悠悠昊天特百茲懷
節芳而完以勵以淑祕發玄堂貞霜皦日

明尚書鄭東園元配淑人黃氏墓誌銘

仙之南溪黃顯姓黃之畊叅幕蠡州水陸道萬里觸突
蛟龍尾獅象豺虎而交其跡毒風瘴霧健兒不可往淑
人穉弱女請侍以偕慧與年進母某曰異哉州幕曰然
無諾凡壻尚書東園公起屏山軒特秀穎書過目意以
會文字瀾立星回晶采彌發先侍郎松庵翁曰鄭故聞

人兒其復出矣先淑人吳曰然無諾凡婦鄭簡斥數婦
黃亦睥睨數壻久之方通名松庵曰宜卜曰吉州幕曰
宜卜曰吉淑人歸于我公柔儀有肅無擅遂無獨成驗
然後言叅知焉然後動移所事州幕者事松庵母事吳
昆弟其妯娒有裕朝日祭日賓嘉之日視星數起公曰
早淑人曰早早有優辦縮伸歛散紓劇而勞以理周急
應泛無滌漉以居於羸公榮名極位出入中外餘四十
年淑人偕官所者十僅一承以副室九焉封孺人恭人

又封淑人名夫人韋布相安若罔知物采為異子罔知
有嫡庶恩施義束內外多成名公翰林在告聯屬疎戚
節約幼賤干指食無間言隱然義門規則流聲遠近皆
服深輯睦而以相理善淑人公致南京戶部事歸屏山
階有榮祿淑人竝收榆境公戲曰夫人由身貴要亦由
身冷熱以異即死先老夫果先正德戊辰公卒淑人前
丁卯也上距宣德甲寅歷七十四甲子朝夕奠同几筵
賜藏同穴同舉舉以窆與享錫命之祭齋送之盛填滿


城之西仙人及與為榮子主一國子生娶嚴主敬進士
觀大理寺政娶傅又娶林季主忠湯出由蔭待選猶治
進士業娶吳女適周禮李銓陳華皆宦家季李出議吾
子週華第進士與禮主一俱卒二女一婦與主一舉子
之黃以節聞竝著周被有旌命孫即登瀛邑庠生娶陳
其一未晬孫女適張某楊某其一議林某癸酉之冬之
仲葬得日主敬以御史李君鼎之狀請銘嗚呼妃匹風
化之始樛木美逮下之仁以基螽斯麟趾之盛而鵲巢

女子蘋藻之夫人專靜嚴敬歆感之化刑于有賴焉銘
以訓世固宜銘曰坤主於受順承天施不牝于晨職婦
是宜懿懿淑人惠和敬止素絲羔羊翊贊君子柔順安
貞寡笑與顰祇將內事無巧鑿真薰和毓祥式昌厥似
少君之妻申國之母

族兄淳翁墓碣

烏山淳翁兄玄堂成銘其碣曰世顯懿叅中司食故大
惠永遺珠之原夜雙玉預兩季光有沃桂樹離離芝綈

緡



見素集卷十六